

Lettre Jèrriaise, Sanm'di lé 15 dé Juilet 2023

Bouônjour bouonnes gens, ch'est Jemima Horn, tchi vos présente la Lettre Jèrriaise aniet, Sanm'di lé tchînze dé Juilet deux milles vîngt-trais.

Jé d'meuthe à St Cliément et j'sis St Cliémentaise. J'ai tchînze ans. Jé c'mmenchis à apprendre lé Jèrriais quand j'avais huit ans et j'espèthe d'apprendre dé pus en pus! Jé d'meuthe au bord dé la mé auve ma m'mée et man p'pée et malheutheusement, man frêthe! J'sis eune êtudgiante au Collège ès Fil'yes. J'ai trais cats et eune tortue. Oulle a pus d' chent ans! Achteu, j'sis à faithe eune expéthience dé travas siez l'Office du Jèrriais pour eune s'maine!

Lé Lundi pâssé, j'èrgardis plusieurs présentâtions par d's écoles à l'hôtel Radisson. J'trouvis chenna magnifique! Après chenna, j'm'en fus au Collège ès Fil'yes auve l's années douze et jé jouînmes au bîngo. Et pis, j'êcrivis ma preunnié lettre Jèrriaise duthant l'arlévée. Après, j'aîdgis à l'êcole dé St Luke auve l'année deux. Ch'tait agriabl'ye.

Lé Mardi, j'rencontris Françouais Le Maistre pour pâler en Jèrriais pour eune heuthe. J'distchutînmes entouor les mots qué nou fait sèrvi sus la grève. Ch'tait un pliaîsi! L'arlévée, j'aîdgis au pallion à l'êcole dé St Martin jusqu'à trais heuthe quarante-chînq.

Lé Mècredi, ch'tait du fanne au Musée d' Jèrri auve l'êchipe dé maîtres et maîtresses dé L'Office du Jèrriais at Geraint dé l'Héthitage d'Jèrri. J'visitînmes l'exhibition "Bouan Appétit" tchi 'tait hardi intéressante. Pus tard dans la journée, j'fus à l'êcole la Mouaîe auve les mousses de chînq ans en d'houors dans la bouaîs'sie.

Lé Jeudi, j' pâssis la matinnée à l'êcole dé Pliat Dou auve plusieurs clâsses. Ch'tait eune bouanne expéthience. L'arlevée, j'aîdgis au pallion à l'êcole dé Grainville auve les êtudgiantes du même âge qué mé.

Lé Vendredi, j'fus à la grève à la Motte auve l'êcole des Grands Vaux. Ch'est la grève que j'aime lé mus! Les mousses trouvent eune étaile dé mé et des d'mouaiselles. Malheutheusement, i'tchiyait d'la plyie. À la fin, j'aîdgis à l'êcole dé Mont Nicolle auve la dan'sie et j'lius "D'vinnâle dé marmoûset" ès mousses dé la clâsse.

M'n expéthience dé travas 'tait mangnifique et j'ai apprîns un tas. J'ai bein aimé pâler l' Jèrriais chute s'maine. Mercie bein des fais d'm'aver êcoutée à matîn et bouanne fin d'la s'maine.